

贊頌傳
稊文題跋

DS

751

L48A2

1705

V. 12

李忠定公文集



EAST ASIAN LIBRARY
UNIVERSITY OF TORONTO LIBRARY
130 St. George Street
8th FLOOR
TORONTO, CANADA M5S 1A5

宋李忠定公文集選卷之十三

皖桐左光先羅生選



明宗人李春熙皞如輯

宋李綱伯紀著

宗裔李嗣立較正

後學孔登高重訂

贊

洪崖先生畫贊

洪崖先生張氲、隋唐間人、隱於南昌之西山、所乘驢、
名之曰雪、僕數人、曰拙、曰木、曰藤、曰葛、曰橘、出則負
巨扇長瓢以從之、多繪以爲禽、蓋有道者也、爲之贊

云、洪崖古先生、傲睨得天逸、結廬西山、下踏雪時一
出、長瓢與巨扇、此外了無物、借問侍者誰、拙木葛藤
橘、何年丹青手、寫此神仙質、高風邈如在、超然入吾
室、

梁谿真贊

梁谿公號也

是爲梁谿了無差別、行年之化、三十有八、返觀其前、
膚腴色悅、從是以往、蒼顏華髮、本來面目、不生不滅、
游戲仕塗、天付之拙、順天而行、一無敢設、獨知其天、
寧有他訣、萬里清風、一輪明月、有來問者、默然無說、

瑞光岫立化雀贊

宣和二年正月二十四日有雀立化于瑞光岳之佛
殿香爐上宗本之徒明贖來沙陽出畫圖示予以偈
贊曰菩薩游戲于神通六道四生咸可入爲欲化導
諸有情故于異類而出現諦觀此雀甚微耿每食一
粒棲一枝卑飛不出蓬蒿間遠舉安知鴻鵠志而能
坐脫與立亡依彼金容及香火屹然而化不震動如
以木石鐫刻成非諸菩薩威神力孰能現此希奇事
我觀三界諸衆生惟人實具大智慧妄想顛倒造諸
業失身淪入旁生中重爲毛群輕羽族破碎一切諸
蠕動雖云妙覺不銷亡無那沈迷益懸遠菩薩慈悲

哀憫故現身與彼爲導師、緣終寂滅、顯示人、使知佛性無有二、佛子若有瞻禮者、願言悉發敬信心、勇猛精進趣菩提、皆具如是菩薩行、

天王院新塑釋迦像金色珠贊

宣和庚子之秋、沙陽天王院、命工創造釋迦牟尼大覺金仙之像、邑之士女童稚、出力施財、運致土木、不約而會、旣勤樸斲塗墍之功、而采飾未施、相好未具、有以工之所摹畫爲未然者、將毀其像而改造之、始建是議、而像出異物、色如黃金、顆如真珠、徧滿佛身、及蓮華座、如水布沙、如蠶種子、璀璨熠燿、光奪人目、

士女童稚、瞻禮贊歎、隨意撿取、已而復生、不可勝紀、
於是曩之建議者、悔罪懺非、財施益盛、緣事遂集、客
以其故、語予往觀、信然、得數粒以歸、予雖不能知其
果爲何物、然竊思諸佛顯示神變化導、有情不可測
量、方其入大涅槃、現舍利子、諸天及人、建窣堵波、種
種供養、以作佛事、與此事設現金色珠、攝伏不信、增
上慢者、其理一也、惟舍利子、體極堅固、鍊鍛焚燒、所
不能壞、而此珠虛脆不實、力可破碎、爲不同耳、蓋舍
利子者、報身所成、而此珠卽土木假合而化、故不得
不異也、知諸佛法、如幻如夢、如像如響、如光影、如空

華如尋香城、如變化事、則彼報身、與此土木之所假合、彼舍利子堅固不壞、與此珠之虛脆不實、亦無差別、惟達諸法空者、可以語此、梁谿居士、欲重宣此義、以偈贊曰、

稽首釋迦文、善逝天人師、緣終示寂滅、無量舍利子、悉建窣堵波、天人共瞻禮、像法住世間、化道諸有情、亦示大神變、攝伏不信者、璀璨真金色、清淨妙寶珠、卽彼土木中、現此希奇事、有來瞻禮者、隨取卽與之、旣與出愈多、不可爲量數、當觀舍利子、及此金色珠、堅固與虛脆、無異無差別、佛子具智慧、悉發敬信心、

勇猛勿復疑、歸依無上道、

富鄭公畫像贊

契丹自澶淵之後、通好守約、不復盜邊、至慶曆間、以我方用師西鄙、且厭兵、因聚重兵境上、遣使來聘、欲求閔南故地、中外震懼、是時富公受命報聘、旣見虜主、爲陳通好、則人主專其利、而臣下無所獲、用兵、則利歸臣下、而人主任其禍、虜主感悟、因許增歲幣、而契丹平、北方至今無事、其後河朔大水、民流京東、公時知青州、兼京東東路安撫使、擇所部豐稔者、五州、勸民出粟、益官廩、以賑濟之、得公私廬舍十餘萬區、

散處其人、凡活五十余萬衆、立法簡便、天下至今法之、惟公以制科中第、歷諫官侍從、以至宰相、危言直節、以道進退、勲業甚茂、然功在社稷、德在生民、此二事爲最、予嘗讀公諫垣集、奉使錄、慨然想見其風采、及來沙陽、見公繪像於羅疇老家、命工傳寫、且爲之贊、庶幾日瞻儀刑、以慰慕仰之心焉、其辭曰、

天下達德、惟仁智勇、合之成體、散之致用、鼎鼎富公、備此三德、直道不回、以相王國、其智伊何、見於使虜、敷陳利害、以悟其主、歡盟至今、莫敢予侮、其仁伊何、見於救災、饑民如雲、襁負以偕、法簡思周、垂訓將來、

何以行茲、斷以勇克、衆人所懼、公獨不惑、奪虜之氣、厲色折之、賑民之饑、誠意活之、我生後公、今覲厥像、丹青載傳、朝夕是仰、

龍眠居士畫十六大羅漢贊

第一尊者正坐垂足手隱橫板交十指爪前有居士作禮鬼使致書若請召狀後有侍者叉手而立

佛所印可、大阿闍黎、隱几合爪泊然無爲、懇請何人投地作禮、不起于坐、應供千里、

第二尊者正坐肩倚拄杖左手握拳近口右

手垂膝把經卷微露梵書設鑪香後有侍者
回顧一婆羅門手抱稚獅子

倚杖于肩屈指近喙廢經不讀思第一義大獅子吼
真獅子兒轉秘密藏其誰能知

第三尊者正坐跏趺以兩手叉指置足上昂
首仰視錫杖倚牀前有胡人佩劍曲拳後有
蠻女捧香山而立

叉指膝間目視霄漢意象軒舉邈無畔岸剛大之氣
塞于天淵俯仰無忤縱心浩然

第四尊者據巨石植右膝而坐手持數珠下

視一大蛇蟠繞石前有童子震怖擲淨瓶中
穢于地侍者抱撫猶竊回顧

華林擾虎手舉數珠馴彼鷲屈亦用茲乎巨類修鱗
能怖童子慈眼視之毒心自弭

第五尊者偏坐蹠一足手執拂回顧侍者於
蓮化餅折蓮房以獻瓶中有戲龜童子跪而
觀之後有胡人佩刀植戈而立

藕花蒲瓶蓮房自折神通妙用在於舉拂童子何知
跪觀戲龜六用不藏使之者誰

第六尊者靠禪板植左膝垂右足而坐兩手

展經卷開口如讀前有獅子銜花胡人背手
回顧後有蠻女奴執拄杖侍立

老矣衰疲、背依禪板、讀經何爲、聊以遮眼、植膝垂足、
獅子銜花、杜其德機、豈有斯邪、

第七尊者反掌叉指、跣足而立、仰視空中一
珠、侍者捧香爐、蠻奴佩刀、捧盤盛鐸杵、隨之
寶珠騰空、光焰璀璨、諦玩無數、有見皆幻、堂堂風儀、
龍象之姿、靈杵寶鐸、徃將加持、

第八尊者跏趺正坐、手執方鑑、若說戒狀、傍
有侍者合掌、蠻奴執羽扇、前有后妃盛服、胡

跪若受戒狀二女童侍立

本無戒持、何嘗有破、方便爲說、三世因果、服飾燁然、王者之妃、胡跪諦聽、善思念之、

第九尊者扶杖臨石岸而立、一蠻奴掖之下、瞰巨浸、觀蠻奴以竹器卸經卷花卉置水中、有群魚銜經、蜃氣成樓閣、一龍出沒浪間、

魚龍祕恠、各有佛性、散花接經、出沒游咏、具大悲心、平等施之、徃因奴力、人天之資、

第十尊者倚老松以左手支頤、並足而立、仰觀松杪有猿摘松花以獻、後有蠻奴抱經持

拄杖侍立松竹間有虛禪牀及方案上有古
盆貯水養花卉之屬

長松森然虬枝拂天支頤據木仰睇玄猿竹樹之間
方虛禪座我欲攝衣徃補其處

第十一尊者偏坐左手按膝右手植牀枌上
拳指支頤回視一童子置飯掌中以引鶴

宴坐便安支頤握拳一念不波靈臺湛然婉彼胎禽
就掌取食了無驚猜承誰恩力

第十二尊者垂足正坐回顧第十三尊者笑
語以右手據床枌左手舒掌侍者以餅水滴

掌中

敷座親密、便於笑語、懷抱之適、怡然相顧、瀝彼餅液、注于掌中、普潤四大、一滴之功、

第十三尊者正坐、曲身就第十二尊者語、以手按板作屈指狀、拄杖倚禪牀側、後有侍者及二童子碾茶治具於竹林間、

俯身說法、未能忘言、無量妙義、見於指端、童子茗供、竹間治具、滌煩消渴、惟此之故、

第十四尊者長髯郁然、不剃、植杖林間、倚巨松而立、觀二鹿出岵石、傍銜花以獻、

麋麋群鹿、出于品端、植杖倚松、寓目縱觀、風度凝然、
萬法皆了、去髮留髭、豈無所表、

第十五尊者携杖以虎負經、自隨有老人道
帽相並尊者舉手作笑語、勢後有鬼神被甲
執旌旗從行、鎖一熊負一沐猴

適從何來、遊歷於此、大空爛斑、負經以侍、有偉衣冠、
山川之神、旌麾戈甲、其從如雲、

第十六尊者於山林水石極幽絕處、以袈裟
蒙頭入定、有懸瀑淙瀉、三蛇出其前一將澗
飲一方行一蟠結

幽谷窈窕、林苒扶疎、瀑布淙射、蛇蟲之居、衲帔蒙頭、安然入定、孰能出之、其獨也正、

保寧禪師真贊

此是保寧風度、具眼衲僧試覷、面孔雖然醜拙、肚裏非常峭措、佛祖一口吞盡、問着當下休去、却就梁谿覓贊、大小一場露布、

頌

淵聖皇帝題十八學士頌

并序

唐天策十八學士圖立本畫像褚亮贊淵聖
皇帝題其姓名以賜太子詹事李詩真絕世

之寶也臣某拜手稽首謹作頌曰

英英策府十八學士森如驥駟才德兼備太宗御之
六轡耳耳嘶風箭雲一日千里丹青之妙寫于縑素
千載風流遇之旦暮於穆淵聖天縱多能遊戲翰墨
識其姓名人物圖繪及茲宸藻是爲三絕萬世之寶
沙漠苦寒翠華未還傷心北顧喟其涕潛安得傑才
如彼諸子扶翊中微國勢振起豈無趙卒爲御以歸
老臣衰疾跂而望之

銘

直几銘

斲木爲几、病夫是憑、限腋扶肘、以便其形、子厚所斬、
次山所惡、問何以然、惟曲之故、我作斯几、其直如矢、
匪彫匪飾、自全厥美、隱之而坐、不倚不局、心凝形釋、
歟、灰稿木、

方杖銘

古后有制、老則賜杖、用之扶持、利有攸往、後世靈壽、
因以徼福、光誇赤藤、美稱桃竹、我作斯杖、不圓而方、
剛健篤實、用行舍藏、曳策逍遙、丘園之寶、孰爲老龍、
放之而笑、

多言人銘

李子遊於古蘭若、有金人焉、啓其口而銘其臆曰、我
古之多言人也、勿謂多言、多言何傷、言而當道、說約
以詳、胷襟流出、與道翱翔、如雲起雷、震于十方、如谷
答響、應而不藏、爛乎如星辰之經緯、沛乎如江漢之
汪洋、五色相宣、黼黻文章、五聲相比、磬筦笙簧、詭知
夫色未嘗色、非青非黃、聲未嘗聲、非宮非商、著於文
字、文字相空、詭能測量、達於語言、語言解脫、詭得稱
揚、滋發上根、下根衆生、一音演說、徧覆三千、大千世
界、舌相廣長、是以予終日言而未嘗言、其心了了、終
日默而未嘗默、其音琅琅、如來入滅、而四十九年、不

魯說法、維摩無語、而三十二義皆發光鐸、惟道之極、
言默不足以載、故予遊戲於辯才三昧、聊自得而倘
佯、李子顧謂其徒誌之、若此者可以多言矣、

潛菴銘

龍興深老作潛菴、梁谿居士爲書其榜、且銘之曰、魚
龍潛於淵、釣罩絕機械、天地潛於心、方寸具覆載、諦
觀此菴中、不廣亦不隘、森羅含萬象、空洞周法界、請
問云何潛、非內亦非外、寶剎現一毫、須彌藏一芥、萬
緣息一機、衆竅虛一噫、足跡不可尋、濕灰乃見恠、百
鳥不含花、負命難索債、全身入虛空、無在無不在、欲

識潛菴人、豈離這皮袋、

傳

武剛君傳

武剛君、姓金氏、名辟疆、其先楚人也、七世祖鏐、居於越之邪谿、聞歐冶子者、通於天地陰陽五行變化之理、得鑄人術、因往見之、歐冶子熟視鏐曰、子之質美矣、嘗試以吾術治之、當爲國器、乃留與居、汰去麤悍、萃其精英、旬鍛月鍊、磨礱而淬礪之、文采豔發、其材氣天下無雙、歐冶子撫之曰、子所謂鐵中錚錚者、合則成體、散則成章、變化不測、其猶龍乎、因號曰龍淵

子薦於楚王、楚王悅之、出入起居、必以自隨、戍震海
內、名聞諸侯、於是晉鄭興師以伐楚、曰、必以龍淵子
爲質、乃罷兵、王與之登城、以麾晉鄭之師、伏尸十萬、
流血千里、楚之所以霸諸侯者、龍淵子之力爲多、親
屈散居四方、時時竊借其名以行、當戰國時、尤寵任
之、其族子有遊越者、以策干越王勾踐、勾踐將封之
以三鄉、及千戶之都、二、以示薛燭、薛燭曰、此國寶也
三鄉二都、何足以當之、其貴重如此、有遊趙者、頭胡
纓纓、短後之衣、以術干趙孝文王、孝文王好之、終日
與之相對、至忘食寢、國事皆廢、於是莊周爲陳其祖

之功德、舉之無上、按之無下、運之無旁、足以決勝天下、而頭胡縵纓短後之衣、其術特庶人之所好、不足多也、王悟、乃疎之、遂廢不用、而當時游俠之士、荆軻聶政之徒、徃徃私從之遊、然皆其術之下焉者也、獨武剛君辟疆者、起於楚漢之間、挺挺有祖風、辟疆之爲人、明銳勁正、遇事立斷、其學長於天文地理、陰陽刑法、兵家戰鬪之術、性剛果、不喜人柔佞、見有禍亂姦宄、必欲削平之、其志氣凜如嚴霜秋水、毅然有不可犯之色、以故亂臣賊子姦邪、見之膽破、服慄、不敢仰視、其與人交、惟有德者陰衛助之、久而無斃、苟非

其人捨去弗顧、秦始皇帝、旣滅六國、焚詩書以愚黔首、隳名城、殺豪俊、收天下之兵、聚之咸陽、銷鋒鏑、鑄爲金人十二、以弱天下之兵、武剛君逖逃山澤間、與一時布衣豪俊遊、其耿耿自若也、項籍少時、嘗從君學不成去、其叔父梁怒之、籍曰、君一人敵不足學、學萬人敵耳、蓋不知君者也、獨高祖微時、雅與君善、嘗俱行豐西大澤中、有大蛇當徑前、行者還報、高祖被酒曰、壯士何畏、乃與君俱行、斬蛇、所謂白帝子者、遂起兵攻秦、旣入關、降秦王子嬰、復與項籍爭天下、戰滎陽、成臯間、武剛君未嘗不在左右、出入臥內、甚見

寵任其後韓信陳平黥布聞之皆亡楚仗君以歸漢以故高祖勝項籍垓下遂卽帝位第功君居第一在蕭何曹參右封之峽中號武剛君賜丹書鐵券藉以錦繡藏之金匱石室使世世襲之又取武庫爲君第國有大事則召君班於殿庭以示褒寵其子孫徃徃勁直明敏萍鋒歛鍔以節義自將能世其家當成帝時有仕於尚方者丞相張禹以帝師位特進甚尊重然阿附王氏不忠帝室平陵男子朱雲廷對曰大臣尸祿素餐願與尚方金某斷佞臣一人以厲其餘上問誰也對曰安昌侯張禹成帝不能用其後王氏果

漢、繇是世益重其家聲、歷漢至魏晉、雖異代猶禮
遇不衰、至晉太康中、回祿氏作亂、劫武庫、焚蕩武剛
君之第、因以失國、而君之遠族干將、顯於世焉、干將
者、與其妻莫邪氏、得神仙幻化之術、隱於豫章豐城
獄中、懷材抱德、氣應於斗牛之間、張華與望氣者雷
煥識之、推其分野、俾煥往搜訪、果得干將與莫邪氏、
而斗牛之氣滅、煥私匿莫邪氏、而以干將歸華、且曰、
是有術終當化去、華知其匿、莫邪氏也、亦曰、久當復
合、及華將遇禍、干將果先化去、而煥之子、攜莫邪氏
過延平津、因躍入水、遣沒人視之、有二龍蟠結、風濤

洶湧、雷電晦冥、因不復見、信乎其得神仙幻化之術、而華煥之言驗云、

太史公曰、古者五行各立其官、金姓蓋出於少昊氏、其族散居五方、而剛柔利鈍、性亦不同、武剛君之得姓、其北方之强者歟、觀其爲人、明利果斷、不凝滯於物、勁正之氣、毅然見于色、其亦鍛鍊淬礪之力歟、卒能佐漢以興、傳國數百載、可謂盛矣、予來延平、感于將莫邪氏之事、考諸傳說、嘉武剛君之烈、採其行事、大畧著于篇、

方城侯傳

方城侯端木子平者堯時人也、負其材、隱居平陽山澤間、鬱然有凌雲之志、弗肯仕、堯命益作虞、益烈山澤而焚之、見子平偉其節槩、薦于其工垂、垂乃命其徒爰戕斤斧之、漆雕氏藻飾之、以見堯于總章、堯是時法度彰、禮樂著、垂衣裳而天下治、國家閒暇、旣見子平、嘉其有局量、井井然以繩墨自治、置之左右、因訪其所學、子平對曰、臣樗散蒙帝力生植長養、今幸得備器使、間分寸淺狹、不足以奉清問、臣之學、上通乎天道、而下極乎地理、中備乎人事、與夫軍旅征伐之法、故周天之度、三百六十有奇、在天成度、在曆成

日而曆法生焉、此天道也、開方之術、提封三十六萬井、內建王畿、外列侯國、而井田之法寓焉、此地理也、好惡相攻、而吉凶生、遠近相取、而悔吝生、情僞相感、而利害生、此人事也、不戰而屈人之兵者、爲上、以攻則勝、以守則固者、次之、以詐謀得者、又次之、此軍旅征伐之法也、堯方命羲和、奉若天道、曆象日月星辰、以閏月定四時、成歲、又命禹平水土、奠山川、底貢賦、錫土姓、而苗民有罪、命禹徂征、且伐叢支、胥敖氏之國、其說皆與子平合、將歷試之以事、而堯之子、丹朱不肖、懼其飽食終日、無所用心也、命子平教之、未幾

丹朱、悉傳其術。帝用嘉之。列爵分土、封之方城。而子平有二子、長曰太白、次曰太玄。子平中分方城之地以予之、且教以兵法。二子不相能也。日尋干戈、以相征討。太白矜太玄之弱、嘗聽其增甲兵、布行陳、定營壘、然後與之戰。而太玄傲然不服。轉戰逐北、虔劉其邊陲、俶擾其腹心、虜掠其士卒、攻圍侵斷、智詐百出。戰罷效首虜、計土地、雖勝負不常、而太白之勝居多。其用兵之法、雖臨事制變、不可窺測。然循理而動、致人而不致於人者、常勝。不計利害、深入浪戰者、常敗。有知兵者、從旁觀之曰、此無佗、爭先法耳。夫方城闔

四境之內、地方不過數百里、而二子之戰、積月累歲、紛拏不解、此與蠻觸國、於蝸角時、相與爭地而戰、伏尸百萬、流血千里者、亦何以異、然二子方其戰酣時、不知天之高地之厚、寒暑之切膚、饑渴之爲患、晝戰不足、繼之以夜、盖有血氣者、皆有爭心、而二子特甚焉、其善用兵、出於天性、非積習所能致、每戰軍士皆啣枚、但聞擊搏之聲、進退緩急、惟所指使、雖戰死、不離部伍、戰勝亦無敢謹譁以爭功者、其操術然也、方城侯爲人方整嚴重、外雖有廉隅、邊幅而其中坦然、二子圓猾、黑白太分、勇而好鬪、殊不類其父風、然要

自方城侯教導指縱之使然、與斟灌斟尋氏兄叢相
攻、而宋人教其子爲儒墨者、異世而同科、二子旣日
以攻戰爲事、其陰謀竒計、傳於後世、縉紳之士、多好
之者、然弗專心致志、則弗得也、有業其術、得待詔金
馬門者、徃徃善其事、而閭巷廝殺輩、亦喜稱道之、然
習之弗精、不善攻戰、而資守勢、至有以緩頰遊說、而
勝者、方城侯之學衰焉、

太史氏曰、世多咎方城侯教二子、不以詩書禮樂、而
以兵法、攻伐不休、廢時亂日、欲執其父子投諸江、與
共鯀驩、流竄放殛、同其罪、殊不知方城侯之學法

象所寓、有聖人之遺意、而軍旅征伐、先王所不廢也。
永日多暇、遊目方城、命二子、小試勒兵、掉鞅摩壘、折
馘執俘、聞智角力、相與周旋、亦有足觀者、殆孔子所
謂爲之猶賢於已者乎、

宋李忠定公文集選卷之十四

宋 邵武李 綱伯紀著

明 皖桐左光先羅生選

筠陽戴國士初士訂

宗裔李嗣玄較正

雜文

桂齋上梁文

螺江入海、引朝夕之靈潮、雞岫連雲、萃川原之爽氣、
茲爲福地、爰卜寓居、植雙桂於僧園、結數椽之茅宇、
雖慙肥遯、實獲素心、同樂天鑪峯之草堂、繼惠遠虎

溪之蓮社、迨其吉日、舉此脩梁、突兀東山、接靈源之
勝槩、岩峩西嶺、藉高木之清陰、剪剔荆榛、旣開三徑、
疏治潢潦、爰鑿兩池、松筠儼以成行、荷芰紛而擢秀、
滋蘭菊以共畹、蕝芝朮而接畦、嘉橘芬芳、綠苞露重、
荔支璀璨、丹實星垂、芳菲不絕於四時、泉石粗供於
一壑、銅瓶夜汲、有風月之陪從、蕙帳曉開、無猿鶴之
驚怨、蓬戶嘗開、而雀羅可設、花徑不掃、而朋簪自來、
一觴一味、以暢幽懷、三沐三薰、以語至道、細推物理、
洞觀天地之情、廣覽前言、極備古今之變、嘿然放杖
而笑、筦爾抱膝而吟、餌藥扶衰、願究無生之學、登山

臨水終諧樂死之心、冒危險以全身、已憑天造、享優游而卒歲、實荷皇恩、敢效歡謠、聊陳鄙志、

兒郎偉拋梁東、日上千峯海氣紅、未向扶桑倚長劍、且浮瀛渤看珠宮、

兒郎偉拋梁西、喬木侵天夕照微、但得長生歛芒角、最憐新月掛蛾眉、

兒郎偉拋梁南、翠竹蒼松秀色參、南極老人疑我是、笑將白髮照澄潭、

兒郎偉拋梁北、魏闕迢迢拱宸德、斗車錯落轉高秋、帝座熒煌明紫極、

兒郎偉拋梁上、合璧連珠森可仰、寸誠何以格蒼穹、
空餘縹緲青霞想、

兒郎偉拋梁下、秋色初來正瀟灑、已慙謝傳臥東山、
更愧裴公開綠野、

伏願上梁之後、年書大有、運際中興、安枕山林之間、
不愁群盜爭席、漁樵之侶、誰識故侯、採薇散髮而爲
物外遊、樂聖銜杯而得醉中趣、放懷自適、與世相忘、
自天祐之、吉無不利、

答賓勞

賓勞主人曰、蓋聞士生於世、不逢則已、苟逢其時、則

必下收衆譽、上結主知、舒翹揚英、發策吐奇、隨勢如
轉圜、應變如發機、默於所當默、爲於所可爲、服冕乘
軒、衣繡執珪、澤被九族、榮耀一時、今子奮身寒苦、遭
世隆昌、歷金門、上玉堂、載筆螭坳、日侍清光、曾不能
結舌鉗口、循默自守、功名富貴、計日可取、顧乃犯忌
觸諱、志濶論疎、效長孺之妄發、類平仲之過趨、幸蒙
寬恩、薄謫坤隅、倥傯筦庫、沈冥簿書、曾不愧悔、色澤
膚腴、何其謀身之拙、而執心之愚乎、子殆病矣、我其
勞諸、主人隱几、輒然笑而荅之曰、若子之言、無自而
可、我將勞子、而子有何勞於我也、尊尊而君、卑卑而

臣、君臣之義、人之大倫、襲爵履位、上下以際、各盡其道、非相爲賜、故獻言而計效者、臣也、聽言而出治者、君也、忠臣不避死以立節、志士不求生以害仁、知致其在我者而已、及其成功、則天也、昔者呂望興周於屠釣、伊尹干湯以鼎俎、審戚悅齊桓於飯牛、百里奚得秦穆於五羖、馮唐以立談而感文、千秋以片言而悟武、馬周山草茅而合太宗、婁敬脫輓轡而說高祖、收功當年、垂譽千古、今予人雖微、而屢蒙擢用、位雖卑、而接於侍從、與聞國論、職書言動、倘遇事而緘默、戀爵祿之榮寵、雖保身之計得、將逆天之是恐、觀於

古人、槩可考焉、舜命臣以弼違、孔立教於犯顏、周設
官以詔嬖、而諫惡、軻著書以陳善而責難、西旅貢獒
而召保訓、太廟納鼎而臧孫言、共驟諫如趙盾、其強
諫如鬻拳、時運而往、風流猶傳、或伏蒲以移咎、或還
笏而歸田、上足可躡、帝裾可牽、或額叩於龍墀、或血
汚於車輪、斧鉞在後、鼎鑊在前、咸蹈禍而無悔、豈邀
福於未然、故能使當世之主、勉強以聽、感動而俊、或
藏斷畧以志良諗、或存折檻以旌直臣、是以士頗得
行其道、而振其氣、雖匹夫之賤、而有所伸、雖萬乘之
尊、而有所畏、衛先王之正道、立天下之公議、底生民

之大福、爲社稷之長計、夫然後士爲可貴也。今則不然、上有仁聖願治之君、下無骨鯁敢言之臣、其曠大之度、寬隆之德、天覆地載、海涵春澤、假狂妄之或聞、罪不過於黜謫、靡聞抗論危言之士、誅戮以竄殛也。而士咸沁沁浼浼、拘拘戚戚、取容吮阿、擬步跼蹐、翕肩蓄縮、卷舌噤默、觀時低昂、逐勢反側、保寵祿以饗富貴、其視天下漠然、如越人而視秦人之肥瘠、譬猶仗下之馬、韉上之鷹、飽毛血而不搏、飫芻豆而不鳴、俗日益媮、士日益輕、其何以功利社稷、而紀綱朝廷乎。今子惜我以功名富貴之失、病我以莞庫簿書之

繁以此見勞、又或不然、以展禽之仁、三仕以三黜、以仲尼之聖、委吏而乘田、魯連抗志於蹈海、仲子辭榮而灌園、子雲不能汲汲而執戟、望之不肖碌碌而枹關、士各有志、語不同年、以此易彼、未知孰賢、予雖負於罪戾、猶得齒於官聯、職事粗辦、逸居飽食、入則左圖而右史、出則前溪而後山、從吾所好、其何適而不安也、且予聞之、天廻地游、日居月諸、塵跡俯仰、急景湏臾、藹馳空之野馬、忽過隙之白駒、旅浮生於萬世、寄眇質於八區、守滿堂之金玉、眷疆名之妻孥、節槩不立、道義缺如、自昔富貴而磨滅者、不知其幾、咸梗

莽而丘墟、方竊竊然自以爲智、不亦愚乎、且夫禍福倚伏、變化杳冥、震盪廻薄、未嘗暫停、彼秋之搖落、爲春之敷榮、彼冬之凜冽、爲夏之歊蒸、霽極則雨、晦極則明、剥終則賁、否終則傾、管仲射鉤、卒爲仲父、傅說胥靡、乃相武丁、體道出處、因時止行、窮非我病、達非我榮、雖死生不足以動心、又何富貴之與功名、抑又聞之、道貴常虛、物禁太盛、富爲怨府、貴爲禍柄、隙不在大力、難久勝、德裕纍兆於奉策、霍氏禍萌於驟乘、與其一跌而赤族、曷若退居閑處、樂天而知命、予方築室山林、買舟江湖、與蒙貸宥、得歸故廬、樂惠山之

泉石、友梁溪之龜魚、圃有松竹、凡有詩書、晚食當肉、
安步當車、玩意寂莫、遊心物初、以此終身、又安知榮
辱利害之所如也、若夫方朔以滑稽而玩世、欽明以
姦諛而託儒、主父願烹於五刑、伯倫寄傲於一壺、商
鞅挾三策以鑽孝公、終軍請長纓而繫匈奴、韓非立
言於五蠹、孤憤之說、蘇秦勵志於捭闔揣摩之書、僕
誠不能與數子並、故默然獨守吾之拙愚。

釋疑

宣和改元、夏六月、京師大水、自都城之西、渺如江湖、
不見涯涘、踰汴堤、循顧子門、以及北郊、浸辟雍、蕩玉

津園、以及藉田、漂溺廬舍人畜不可勝計、於是諸門
悉土藉新城、以爲固、獨東方門、南界汴堤、北距夷門、
山水所不至、而去都城十餘里、決汴渠灌田野間、以
殺水勢、於是漕運不通、而畿甸悉罹水患矣、先是累
雨、有異物、形如龍蛇、自雨中降、獲而殺之、識者以爲
水祥、已而果然、予時僞員左史、心獨異之、竊觀主上
降詔遣使、所以憂勞者甚厚、在位者緣此、必有發憤
納忠之人、乃寂不聞、愚戇不能自巳、因奏疏論列大
意、謂變異不虛發、必有感召之因、災害未易弭、必有
銷伏之策、宜寅畏天戒、招徠讜言、且請因侍立、許直

前奏事以盡所欲言、疏奏、屏息以俟、翌旦造朝、侍立如常儀、旣而宰執奏事班退、傳旨閣門令先退、不復得對、因上章待罪、遂有沙陽之謫、客有獻疑者曰、有官守、有言責、子以記注爲職、無言責、而論事、非侵官乎、予應之曰、古之爲臣者、皆可以有言於君、故有師箴、瞍賦、矇誦、百工諫、近臣盡規之義、後世官守言責旣分、則獨執政大臣侍從、論思獻納之官、與夫任臺諫之職者、可以言天下事、左右史、雖卑、然日侍天子清光、以記言動、居兩省、綴侍從、末遇所當論者、論之乃其職也、曷爲侵官、昔唐魏謩由右補闕、遷起居舍

人文宗謂之曰、事有不當、毋嫌論奏、暮對曰、臣頃爲諫官、故得有所陳、今則記言動、不敢侵官、帝曰、兩省屬、皆可議朝廷事、而無辭也、祖宗之制、雖館職許論事、況左右史乎、馮京、范仲淹、皆以左右史論事、罷去、唐介、文彥博、相與廷辯、則蔡襄直前論之、以所論不當爲罪、則有矣、未聞以侵官爲罪也、予曷不責今之不言而曠官者、顧乃責我以侵官耶、客曰、然則近世任此職、曷爲無論事者、予應之曰、左右史、去侍從一間耳、幸而不以罪去、給札召試、則進居侍從之列、今人以得侍從爲榮、故例爲循默、以俟遷耳、客曰、然則

吾子胡不爲之意有所蓄、姑俟他日未晚也。予應之曰、是何言歟。人臣以利爲心者、可與事君也乎哉。貪位慕祿、遇事循默而不敢言、非以利爲心歟。以利爲心、則亦無所不至矣。且士氣不振久矣、在下者惟知爵祿之可貴、而決性命之情以爭之、在上者惟知爵祿足以籠天下之士、而視外廷之臣、蔑如也。予爲此懼、竊不自量、欲以區區之身、而救一時之弊、豈苟然哉。况夫以左右史爲未可言、而必待侍從、以侍從爲未可言、而必待執政、以執政爲未可言、而必待宰相、以宰相爲未可言、而又必待其時、則果何時而可以

言耶、此特保富貴、爲妻孥計者之論耳、未可與語以
道事君之說也、客曰、當其可之謂時、故言於可言之
時則從、言於不可言之時則凶、今子之言時乎、予應
之曰、當其可者、謂當夫事之可者也、當夫事之可則
爲時、故時然後言、人不厭其言、如必待其時之可則
龍逢比干之徒、當爲罪人矣、昔之君子、於邦有道則
危言危行、故鯁直之論、必陳於聖明之主、而防患之
說、必出於治安之世、禹之戒舜以無若丹朱傲、惟慢
遊是好、太公之訓武王、以不矜細行、終累大德、以帝
舜武王、而其臣之所告者若此、何哉、愛君之誠深、則

納君之言切也、客曰、子之職當言、而時可言則吾旣得聞命矣、敢問子之言曰、變異不虛發、必有感召之因、災害未易弭、必有銷伏之策、夫災異之說、起於漢儒、今子之言若是、揆於吾聖人之學、得無戾乎、予應之曰、昔高宗有雉雉之異、而祖已訓王、以先格王正厥事、宣王遇旱暵之災、側身修行、而王化復行、孔子作春秋、於災異必書、所以謹天戒也、漢儒乃附會而爲之說、牽合穿鑿、使人難信、此所以得罪於聖人、若夫遇災而懼、正厥事以謹天戒、乃吾聖人之旨也、何戾之有、客曰、借使子得請而直前、則所論者、將何爲

予應之曰、孟子不云乎、一正君而國定矣、所謂正者、豈事事而爲之哉、特在夫心術之間耳、茲事體大、未可以立談判也、客愕然曰、曩也吾有疑於子、今聞子之言、渙然冰釋矣、因敘其語以爲釋疑、

華山辯

五嶽之名、若岱宗、謂告代之所、嵩處中而特高、衡居下而適平、其理皆可以意推、獨華山命名之義、最爲難曉、字說謂華、西方嶽也、故指所生物、與琥同意、說者曰、白虎通、謂少陰生華、夫物以春華、故素問言天地氣交、萬物華實、西方乃擎歛之地、何華有之、又曰

華山有蓮華峯、其上生蓮華、退之詩、所謂太華峯頭
王井蓮是也、指所生物、因是得名、夫草木之華、皆華
也、何獨取夫蓮華而謂之華哉、竊嘗疑此說、以爲未
然、元符間、予西遊、過華陰、縱觀太華、自平地斗起、數
萬仞、氣象雄偉、與衆山之邈迤、不可同日語也、今來
沙陽、見其圖於羅丈疇老家、疇老頃常官華州、得此
圖、尤不失真、開視恍然、與昔見無異、因得其所以命
名者、周官曰、使無華離之地、禮曰、爲天子副底、則華
之、凡有所分者、皆謂之華、故草木之華、謂之華者、以
其分故也、山之形類多上銳、獨太華、其上翼然、分而

爲二、如草木之華、故名曰華者、以山之形名之也、其傍小峯、與之相類、則曰小華山、意可見矣、以經考之、凡山之名、有曰熊耳者、有曰龍門者、有曰砥柱者、有曰析城者、皆名以山之形、奚獨於太華而疑之、事不親見、而爲之臆說可乎、此不可以不辯、

戒貪

盜入梁谿之室、探囊發篋、得白金器數事、因警而逸、候人疑而訊之、色變、執於有司、計贓抵罪、其法當黜、梁谿愀然曰、之盜也、妄意室中之藏、朝思夕計、以迄于成、惟一貪心、更無他法、方其始入於吾之室也、自

謂得志、慨然負匱挈篋、擔囊而趨、不幸而警、所得不
足以克其欲、則噓然有不滿之意、迨執於有司也、曩
之所營度而探取者、無一可得、而得其罪焉、與夫世
之貪者亦何異、今有人焉、挾穿窬之器、乘間抵巇、幸
人主之不悟、以取富貴、爵位、極矣、金繒溢矣、子孫官
矣、猶且噓然有未足之心、一旦溘先朝露、則向之所
貪者、無毫髮之得、而所造諸業、種種現前、獨以身當
之、淪入若趣、有至於積劫而不能脫者、自智者觀之
其異於此盜幾何、因書之以爲貪者之戒、

書事

書僧伽事

世傳僧伽爲觀音大士化身其神變示現之跡載於傳說著於耳目不可勝紀予獨書其近年親所見聞者三事政和五年予自考功員外郎告假于朝迎親吳興是年秋還抵泗上謁僧伽塔將修僕塔下其日天未明普照長老肱齊走人報曰塔有光相宜速至瞻禮予奉親攜家以往則日始出矣有青色光自相輪頂如倒浮屠上屬霄漢觀者如堵固已嘆異得未曾有及辰巳間天無纖雲秋日愈明而塔之西北隅第四級銅鐸中現大寶珠色如爛銀如水晶旋轉不

停光彩炫燿、錄人精目、凡一餉時、若有掣之者、珠自鐸口中入、而第五級鐸復吐一珠、與前珠等、湏臾入者復吐、吐者復入、塔之三隅、自第四級至第十三級、衆鐸皆然、惟東南一隅正與日對、珠隱不現、其楹桷間、小鐸中亦各有珠、垂布周匝、璀璨相射、如白月晝、燃百千燈、照滿一塔、空中寶光、飛騰往來、大者如星、小者如舍利、熠燿繽紛、若可承攬、至午未間、方漸隱去、如是者凡三日而後已、時部使者張根、劉燾奉使徐裡、郡守吳公懋、與其僚屬畢會、士庶瞻仰、謂自昔顯宗神變、未有若之盛者、其後肅齋具圖以聞、有旨

賜號摩尼寶光之塔、此一事、予得于所見者、八年東
南大水、泗上尤甚、淮瀆泛溢、不及城者數板、城門不
固、水夜自門以入、所漂蕩者凡千餘家、人情惶駭、莫
知所爲、方擾攘中、有僧持鉢以乞、或以餌餅施之、且
告之言、此何時而乃求化耶、僧笑不答、袒去上服、徑
趨入水、其去如風、俄而城樓自摧、正湮水道、于是人
力可施、水患遂弭、詰旦官吏、按視城樓之摧、斬然
無尺椽片瓦之遺、積於壞門、如累疊然、始知是夜乞
食者、乃僧伽也、郡官相率禮謝塔下、開扃則所施餅
餌、尚留鉢中、此一事、予得於所聞者、明年改元宣和、

其夏京師積水、暴集都城之外、浩如江湖、是時僧伽
出見輦轂之下者、凡三初見于感慈塔、若揮扇然、又
見於天清塔、又見於相國之東塔、皆從二侍者、爲行
道相、都人瞻禮、闐隘衢巷、已而水退、都邑底寧、有詔
進封普慈巨濟大士、秩視伯爵、誥命之辭、有曰、其儀
屢見、萬目具瞻、歸然靈光、佑我昌祚、蓋謂此也、予時
自左史謫下去京師、此一事、無得于見聞者、惟普慈
巨濟大士、滅度至今、五百餘年、而乃以光景形相、威
神、神力、與人相濟、拯危弭患、靈跡顯然、如常住世、蓋
其誓願宏深、神化自在、具大慈悲、與此土衆生、有大

因緣、故能示現昭昭若此、世謂觀音化身而維摩詰
所說經、亦云菩薩住不可思議解脫門、能以神變作
諸佛事、攝受衆生、寧不信歟、故予直書所見聞者、著
于篇、文不雕飾、使深達實參修菩薩行者有所稽考、
凡與見聞、皆發信心、皈依妙覺、時宣和二年三月二
十五日、昭武李綱沙陽寓軒書、

書杜祁公事

彭器資尚書、初擢第爲天下第一、東歸道南郡、謁杜
祁公、語旣久、祁公教之治生事、器資退而思之、不曉
其意、來日復見、問其故、祁公徐曰、無他、觀公志氣、欲

立名節、夫欲立名節者、非有生事、使無顧念、妻孥之憂、則不可、於是器資深服其言、噫、中世士大夫、以仕宦爲家、不治生事者、十常六七、位朝廷、任言責者、雖有可言之資、徃徃還顧無所歸、爲妻子計、鉗口結舌者多矣、間有不恤此者、言出身貶、妻孥流離、困餓、無以糊其口、於四方、至使流俗、指之以爲戒、可不悲哉、觀祁公之言、乃知前輩思深慮遠、後進之士、不可不知也、

書韓魏公事

歐陽永叔嘗問玉局曰、魏公立朝大節、孰爲難、玉局

曰、莫難於定策、永叔曰、設使吾輩處此時、當如何、王局曰、想亦當然、永叔曰、吾輩皆能爲之、何難之有、王局曰、然則孰爲難、永叔曰、方英廟初立、母后垂簾、一日簾中出文字一卷、皆訴宮禁中事、其辭甚切、公以文字置懷中、徐曰、是必有內侍交構兩宮者、簾中曰、有之、因舉其姓名、公曰、容臣還處置、旣歸省、取懷中文字焚之、命堂吏書空頭謫降勅、徧簽執政、且命開封府、擇使臣一員、步軍司差禁卒二十人、呼簾中所舉姓名、內侍至都堂、立庭中、面責之、填勅編置嶺外、使臣禁卒、卽日押行、來日見上、具道所以、於是兩宮

遂寧、若此者、乃所謂難、故余作畫錦堂記、言公不動聲色、而措天下於太山之安、蓋謂此也、王巖叟著魏公別錄、逸此一事、因書其後、

書曾子宣事

紹聖中、董敦逸爲侍御史、奏疏論宮禁中事、哲廟怒甚、將加遠竄、宰執無敢言者、子宣適與三省同進呈、因奏曰、敦逸庸人不足惜、以言事一不當、而遠竄、所可惜者、朝廷之體、適使敦逸得重名耳、宰執亦以爲言、哲廟怒稍解、其命遂寢、蘇景謨親得此事於子宣、嘗以語予、因曰、人臣不識忌諱、犯人主不測之威、倘

有惜朝廷之體、以一言救之者、其罪必解、昔退之論
佛骨事、憲宗將抵之死、裴度救而獲免、劉禹錫出守
播州、度亦以母老爲言、遂易連州、古人類多如此、今
不獨無救之者、因而擠之、又下石焉者多矣、此風不
可復見、可爲歎息、



宋李忠定公文集選卷之十五

宋

邵武李

綱伯紀著

明

皖桐左光先羅生選

三山周之夔章甫訂

宗裔李嗣玄較正

題跋

皇帝御筆詔書記

皇帝在御之八載、歲次甲寅、冬十月、叛臣劉豫、借助
強虜、稱兵南牧、侵擾淮壩、邊奏來上、有詔親征、戎車
啓途、六師雲集、號令賞罰、悉出宸衷、將士奮勵、人百

其勇捷音載路、屢奏膚公、虜氣震讐、潛軍宵遁、策勲
飲至、慶賚畢行、皇帝慨然、悟前日退避和議之非、治
兵飭備、有不可已者、乃以寇退之初、圖爲善後之計、
發德音、下明詔、以攻戰守備、措置綏懷之方、詢于舊
弼微臣、嘗叨近司、亦與諮訪之列、竊自惟念、受知最
早、荷恩特深、平時常恨屏跡遐遠、徒抱孤忠、不獲以
芻蕘之言、達于丹扆、恭承清問、其敢鹵莽滅裂、以對
旣竭鄙慮、條具上聞、仰塞詔旨、又以朝廷根本、時務
之所當先者六事、冒瀆天聰、惟是學識迂疎、言辭拙
直、大懼不足以裨廟筭之萬一、伏蒙聖慈、容以天地

之度、燭以日月之明、赦其狂瞽、而察其拳拳之忠、親
御翰墨、降詔褒諭、所以寵綏之者甚渥、訓辭溫厚、有
金聲玉振之章、筆蹟瓌奇、有鳳翥鸞翔之勢、天光下
逮、蔀屋生輝、顧臣愚庸、何以稱報、竊觀自昔帝王、當
承平無事之時、圖廻治績、未嘗不求言爲急務、故
堯有衢室之咨、舜有總章之訪、禹重昌言、湯稱好問、
況於履艱難之運、建不世之勲哉、秦詢黃髮、而霸業
成、漢屈群策、而帝功立、光武用寇鄧耿賈之謀、而炎
運復興、太宗聽房杜王魏之言、而唐室大競、古今一
理、何莫由斯、仰惟皇帝圖治之勤、求言之切、博詢精

詳斷以必行、無愧前古、則夫并天下之謀、兼天下之
智、以大有爲、脩舉政事、震耀威武、削平僭僞、底定中
原、紹復祖宗之大業、以致中興、有不難也、臣雖衰病、
待盡山林、傾耳拭目、猶庶幾及見之、謹以御筆詔書、
摹勒成碑、以昭示天下、使知聖君不忘舊臣、詢事考
言、樂取諸人以爲善、如此、用爲獻言者之勸、不其韙
歟、紹興五年、歲次乙卯、九月二十有五、日、具位臣李
綱謹記并書、

道君太上皇帝賜宋喚御書跋尾

宣和內禪、燦然明白、與堯舜比德、視唐三宗爲不足

道靖康之初、金狄犯闕、道君南幸淮浙、淵聖固守京師、兩宮間隔、陰有小人、交鬪其間、所以寇退、二聖重歡、畧無疑阻者、實賴不二心之臣、調護之力也、至靖康末、在廷之臣、多罷去、以唐恪聶山耿南仲父子用事、專以離間、爲進身固寵之資、偃然自謂外敵之不足慮、迨虜騎再至、道君不得行、入居禁中、淵聖始感悟、罷唐恪相、出聶氏耿氏父子、奉使割地、稍召還舊人、然亦已晚矣、都城旣破、翠華北狩、天下臣子、所同憤慨、咸謂敵強我弱之所致、不知禍變之興、以小人離間爲基胎也、夫處人父子間、號爲至難、况當國家

艱阨之際、宗社生靈、安危休戚之所繫哉、其後唐恪
仰藥而死、聶山爲絳人所誅、耿氏父子全家陷沒、相
繼殂隕、天之報施、豈不昭然、方靖康丙午春、臣僞位
樞廷、被旨奉迎道君於南都時、徽猷閣待制、淮南江
浙荆湖制置發運使宋喚、適自淮甸召還、入對、又奉
淵聖御書、如行宮邂逅相見、甚欸、聽其言、蓋惓惓有
意於兩宮者、及紹興丙辰夏、臣承乏江西帥事、復與
喚會於豫章、喚出示道君御書、所以褒獎之者甚厚、
翰墨如新、伏讀相與流涕、乃知前日之言、信不誣也、
追思往事、十有餘年、如一夢間、鑾輿滯於沙漠、而未

還中原困於蛇豕而未復痛心疾首不若無生今者
天啓上心念父兄之辱親御戎輅以臨大敵將士奮
勇盡殲醜類靈旗所指其將恢復境土迎兩宮以還
故都有問安侍膳之期乎杜甫有言周宣中興望我
皇灑血江漢長衰疾此微臣今日之志也紹興六年
十二月十四具位臣李綱拜手稽首謹書

靖康皇太子學書跋尾

靖康初綱備位樞廷嘗一日同宰執奏事內殿蒙恩
賜坐啜茶有旨召皇子國公出見宰執小帽窄衫玉
束帶升自東廂至御座前奏問聖體西鄉與宰執相

揖、日角珠庭、睂目如畫、進止雍容、儼若成人、群臣咸
竊竦歎、後一月、遂正東宮位號、是年冬、金寇再犯關、
都城失守、二聖蒙塵、皇太子亦北狩、天下聞之、莫不
痛憤、嗟乎、生帝王家、正位儲貳、有溫文之德、有天人
之相、一旦倉卒至此、天命之所以難諶也、方淵聖東
宮時、嘗以皇太子學書一幅、贈詹事李公、家藏至今、
其壻許忻、出以示綱、覽之流涕、謹誌其末、庶幾觀者
知流傳之所自云、紹興六年七月二十二日、具位李

綱跋

跋了翁墨蹟

余政和乙未歲、自尚書郎、謁告迎親霅溪、時了翁自
天台歸通川、與余相遇於姑蘇、一再見有忘年之契、
後四年、當宣和之初、余以左史論事、謫沙陽、了翁方
居南康、其族人陳淵幾叟往見之、余因寓書通慇懃、
且以序送淵、并致意焉、旣而了翁荅書、辭意懇懇、至
舉狄梁公、及本朝李文靖、王文正、二公事業、以相勉、
予竊惟公相期太過、非所敢當也、又後七年、靖康改
元、歲次丙午、天子初內禪、金狄犯闕、余蒙異恩、自奉
常、不旬日擢叅大政、實總軍旅之事、踰月寇退、宗社
已安、四方救寧、叨處樞輔、追感知已、恨公云亡、不及

見也、未幾出使宣撫河北河東兩路、月餘而罷、旋即
竄貶、由建昌再謫川峽、適盜據荆南路梗、少留長沙、
前京畿提刑王君以寧、不知於何處得公答余書、橐
獨闕其首數句、示余、俾追思補亡、慨念平生、爲之流
涕、教授吳君致堯復出公墨蹟數帖、求余跋、開卷讀
之、凜然如對面、而聽其亹亹之言也、吳君嘗從公遊、
篤善好學、因錄余書序、及公所答書、并以遺之、以答
其意、且見公知余之厚云、靖康二年、四月三日、武陽
李綱謹跋、

書杜子笑魏將軍歌贈王周士

余趣寧江謫所、取道湘潭、王周士出高麗紙、求書、時金寇再犯闕、將半年未解、余聞召命、將糾義旅、以援王室、萬一不捷、當遂以死報國矣、周士未果行、而許爲之繼、因書杜子美此篇遺之、以激其氣云、靖康丁未、孟夏四日、武陽李綱書于長沙漕司之翠藹堂、

跋了翁書杜子美哀江頭詩

了齋陳瓘也、閩之沙縣人

了翁得邵康節易數、皇極先天之學、心解神悟、多能前知、如丙午歲事、嘗爲所親者預道之、壬寅春、公未沒前數日、其孫壻蕭君建功、以紙求字、公爲書老杜哀江頭一篇、乃絕筆也、非惟筆力遒勁、畧無衰病之

氣蓋寓意靖康之變於其間、以公之學精微知數之
必爾、而平生議論慨然不少屈折、雖流離顛沛、妻子
至凍餓而不顧、可謂不以天廢人矣、蕭君訪余於武
昌、出公書以相示、爲歎息者久之、余嘗著論古人處
天人之際者、正與公合、因并書以遺之、使讀者知公
於古人無間云、

跋了翁自跋敢疑論後

了翁晚年嘗語所親曰、吾往年以論事遭憂患、他無
足恤、所懼惟死耳、今則死生皆置度外、未嘗動心、觀
其自跋敢疑論後、殆懼死時語也、其後謝謫官表云、

海島萬里、不如無子之無憂、江湖一身、彌覺有生之有患、則了無懼意、夫死生亦大矣、以了翁之學、至晚年、然後不以動其心、其難如此、學者可不勉哉、

書襄陵春秋集傳後

許襄陵字崧老名翰與忠定公及吳元中同時爲賢宰執

孔子道大、天下莫能用、因魯史作春秋、以俟後世君子、雖其義難知、然大旨不過尊王黜霸、褒善貶惡、內諸夏、外夷狄、志天道、謹人事而已、春秋經世、其言簡而法、三傳緯經、其說博而詳、簡而法者、必待夫博而詳者、載事實、釋義例、然後聖人之志、因以不泯、猶天之垂象、昭回森布、推步占驗、非得甘石之書、則何以

仰觀此三傳之於聖人、所以不爲無功也、然三家者、
所聞見異辭、所傳聞異辭、各有所長、而時有異同、不
合之說、則學春秋者、宜精思深考、揆之以道、索之以
理、取其是而去其非、則聖人經世之志得矣、或者舍
經而信傳、則是得枝葉而忘根本也、棄傳而觀經、則
是去其石之書而窺天也、二者胥失、余患此久矣、襄
陵許崧老作春秋集傳、取三家之說、不悖於聖人者
著之篇、而刪去其所不然、又斷以自得之意、有發於
三傳所不能言者、余得而讀之、廓然如披雲霧、而覩
天日之清明、燦然如汰沙石、而見金玉之精粹、然後

知三傳果有功於春秋、而集傳又有功於三傳、至於
斷以自得之意、則與夫三家者齊驅並駕、其於學者
豈小補哉、噫、孔子作春秋、而亂臣賊子懼、蓋筆削之
際、游夏不能措一辭、使得其時而道可行於天下、則
誅賞廢置、宜如何哉、雖不見于行事、而垂之空言、猶
足以使後世知君臣父子之道、故太史公曰、有國者
不知春秋、前有讒而不見、後有賊而不知、爲人臣不
知春秋、守經事而不知其宜、遭變事而不知其權、爲
人君父者、不通春秋之義、必蒙首惡之名、爲人臣子
者、不通春秋之義、必陷於誅死之罪、其實皆以善爲

之而不知其義、被之空言、不敢辭、則學者其可不盡
乎、欲盡焉、當自此書始、建炎己酉歲正月五日武陽
李綱書、

書寄崧老易傳後

曳其輪之象、妙處在曳、曳者、自後牽車以緩其行也、
坎爲輪輿、旣濟未濟、互體皆有坎、而初九九二處其
後、故象爲曳其輪、睽體亦然、故六三之見上九、爲見
輿曳、自六三觀之、則上九處坎體之後、疑其無適已
之意、故也、曳之象、皆在陽爻、則非才之剛、而孔武有
力者、安能曳車以止之哉、至賁之初九、亦處坎體之

下則以舍車而徒爲象、此之謂唯變所適、由是觀之、豈非字字有象、而互體之類、曷可少哉、此秘殆亦昔人所未覩也、前所錄數十條、皆考於象而爲之說、旣與世之說易者不同、於襄陵易傳、亦有合不合者、願叅考之、取其是而削其非、因風詳誨爲望、聖人立象以盡意、雖如觀天之不可窮、然意之所在、要有至當去處、吾儕卽象以求之、正如法家斷案、鋪陳法律、求所以當其罪而止耳、不當其罪、則以笞杖爲徒流、相去遠矣、此所以必資於講貫之益、在兌君子以朋友講習理義之說、孰有大於此、惜乎江海之遼絕、而音

問之難通也、此編切勿以示人、非唯尚口、乃窮之時、不足以取信於世、亦其間有未安者、隨得隨改也、所著易傳九卷、總論一卷、外篇釋象十卷、訓辭三卷、明變類占衍數各一卷、合二十二卷、俟定居、當悉錄致左右、以求証明、唯痛加斤斧、乃所望也、

跋歐公書

歐陽文忠公書、清勁自成一家、公嘗言學書、如逆風行舟、用盡氣力、不離本處、蓋不以書自許、士夫寶藏其蹟、非以名節可貴、故邪意外得謗、無如公者、賴韓富諸公辯明之、乃得自白于世、故陳瑩中嘗跋其書、

云、使嘉祐前見此書者、皆如今日、則朋黨之論何由而興、東坡亦以憂奠之後、屢傳千祀、證之艱危、多在於生前、而是非常定於身後、可勝慨哉、

跋司馬溫公帖

朝廷之上事貴當而不貴苟寬、言貴盡而不貴苟合、苟寬則姑息、苟合則雷同、而其弊有不可勝言者、熙寧間、犯謀殺者聽自首減等、非不爲寬、而廷臣毅然爭之、反覆論難不已、至有以罪去者、懼姑息之爲害、而展盡底蘊、不敢爲雷同之說也、當是時、去嘉祐治平未遠、其遺風餘澤、能使士大夫如此、豈不爲天下

福哉、數十年間、士風一變、以馴致禍亂、其源非無所
自也、觀司馬溫公與劉公帖、推許之重、乃至是、前輩
之意遠矣夫、

跋顏魯公與柳冕書

魯公草書、摹傳於世者多矣、此帖尤奇、雖筆勢屈折、
如盤銅刻玉、勁峭之氣不少變、蓋類其爲人、柳冕唐
名士也、魯公名呼之、而自稱老夫、亦可以見當時士
契之梗槩云、

慶餘長老開堂疏跋尾

右建州大中寺長老慶餘師、再開堂疏、先公太師所

作也、元祐中、先公任松溪尉、師住邑之中峯寺、語道相契、數以手帖往還、時叅政呂公、謫居建安、嘗詢納僧中、可與語者、先公以師對、呂公諭州郡、請住大中寺、學者雲集、凡半年餘、呂公一日、約先公同游武夷山、及歸、則師已遷化一復時矣、方其示寂、升堂集衆、告辭跏趺而逝、經一晝夜、顏色不變、呂公泣涕痛悔、恨未嘗款叩師之關鍵、先公謂師平日所得奇特、盍歸誠祈懇、倘能復來、呂公焚香再拜、親以小磬就師耳根擊之、至數十聲、師忽開眼、笑曰、已相別、何必爾爲、公當再留七日、遂下坐、復居方丈、呂公咨問道要、

且請師再開堂、以疏文屬先公撰述、其間有維摩示疾而莫匪爲人、阿難辭世而重來說法之語、蓋紀實也、旣七日、再升堂而化、呂公爲作碑、且載本末、置寺中、宣和元年、綱自左史謫沙陽、道建安、遊大中寺、猶及見碑、讀之一再過、私竊歎仰、後十四年、紹興壬子、歲被命宣撫荆湖、經由建上、屢經兵火、寺宇僅有存者、問碑所在、則已亡矣、爲之歎息、又三年、有住持龍山僧元植者、師之法眷也、間嘗訪師遺跡、惠然見過、出先公所與師手帖以相示、翰墨如新、讀之泫然、因留藏于家、傳示子孫、而爲親書四帖、及開堂疏、以遺

之用慰其心、且使世之學佛者、知道力之圖、死生一如、去來自在、有如此者、紹興五年八月五日具位男
綱謹書、

附錄慶餘長老開堂疏

此忠定公尊人修撰公贈太師諱夔所作也

法門差別、善財勤南歷之誠、祖道流通、達磨露西來之旨、萬派殊流、而宗於一海、千年暗室、而破在一燈、雖桃發前村、自含真諦、而琴逢妙指、方暢清音、喻之者良馬見鞭、迷之者癡猿捉月、蓋飯色之殊、寶器所感不齊、則藕絲之掛、須彌終難信解、不有宗匠、誰爲津梁、餘師上人物外逍遙、法中奇特、

爲已則心境俱泯、應機則殺活臨時、禪律通融、昔
契樂天之問、雲山靜遠、今難思大之居、而况維摩
示疾而莫匪爲人、阿難辭世而重來說法、旣俯從
於輿願、宜遂演乎潮音、肯令雞嶺曇花、不開閩嶺、
必使曹溪法雨、重灑建溪、至道不煩、當仁不讓、謹
疏、

唐子方林夫送行詩章表跋尾

竊觀唐質肅公、論潞公燈毬錦事、有以見當時士氣、
何其忠厚之至也、夫大臣邀寵、進不以正、臺諫論列、
乃其職也、人主未察、震怒竄貶、亦理之常、而在廷之

臣中執法、如王舉正、史官、如蔡襄、皆抗疏直前、以營
救之、能文如梅堯臣、李師中之流、又作爲歌詩、敘述
歎賞、以激義夫之氣、天子悔悟、卒行其言、不旋踵徙
內地、召還復用、嗚呼、茲非士風忠厚盛德之事耶、其
後諫院公、亦論荆公於熙寧間、觸權臣怒、謫官嶺海、
當時名士、以詩送行者、雖不乏人、而營救之風、則亡
矣、一斥不復、卒使抱義納忠之臣、流落以死、其視嘉
祐、得無愧乎、至元符中、道鄉鄒公、以論椒房事、遠竄、
則錢送者、悉置典憲、中丞安敦、彈奏猶以爲輕、望其
據義以爭、難矣、誰復敢以詩章、指時事而揄揚其美

哉茲風一扇士氣頽靡習熟見聞以鉗口結舌爲當然任言責者不過扶摘細故以塞責隨時俯仰以爲進身之資甚至顛倒是非變亂白黑以惑人主之聰明其宵長慮却顧爲防微杜漸之計邪燕山之役廷臣無一人言職此之故馴致禍變至今爲梗非無自而然也由是言之祖宗謹擇臺諫使之敢言以舉繩愆糾謬之職涵養士風使之忠厚以盡激濁揚清之義豈非制治保邦之要道歟唐氏父子繼論時宰於權寵方隆之日亟折廷諍無所顧避使名節之美萃于一門可謂賢矣復用與不復用固不論也然二公

之歿、碑誌不立、其族子、邵陽太守、避懼歲月之綿遠、而前德之堙墜、哀集章表、及送行詩等、合爲一卷、將刻諸石、以垂不朽、其意豈獨貽訓後裔、爲家世光哉、使士大夫、知前輩風節凜然、若此、有補天下多矣、紹興五年、歲次乙卯、八月十八日、武陽李綱伯紀書

跋張嵇仲樞密遺藁

嵇仲名叔夜卽平宋江方臘之亂者

人材因事而奮、節義臨難乃顯、蕩陰之役、血濺御衣、獨有一嵇紹、安史之亂、首倡義兵、獨有一顏真卿、朱泚之變、叱三館之士、使不從賊、獨有一何蓄、豈易得哉、靖康之季、分四道總管、以衛王室、及金寇再犯闕、

或擁兵坐視而不進、或棄軍遠遁以自全、獨樞密張公、總師西道、轉戰以達都城、所謀不從、城陷被執、猶惓惓抗章、欲立趙氏、其忠於國家、大節如此、雖古人何以加諸、綱頃執筆螭坳、寓直東省、公時夕拜瑣闥、周旋甚懽、迨靖康間、宣撫兩河、辟公之子、叔獻以從、嘗見所與家問、勉以忠義、因以歎服、其後聞公遂死、國事爲之流涕、自靖康至今、十餘年、叔獻持節江東、綱帥守豫章、相遇於貴溪道中、出示遺藁數軸、讀之不覺淚之承睫也、嗟乎、士固有一死、非死之難、處死之爲難也、如公之死、得其所矣、彼忘義而偷生者、得

不愧哉、

蕭子寬哀辭

富貴而壽、子孫蕃昌、此世之所謂福也、貧賤而夭、子孫不振、此世之所謂禍也、福善禍淫者天也、而致之者人也、雖聖人立言垂教、使人勸善而懲惡、亦不出於此矣、然而天之道、幽遠而難必、爲善者未必福、故以原憲之賢、蓬戶而甕牖、以展禽之聖、遺佚而阨窮、好學如顏子、而早死、信道如楊雄、而無後、是福善之道、有時而不明也、爲惡者未必禍、故以屠沽斗筭之才、乘時而致顯位、以駟僮負販之術、殖貨而比封君、

楊雄居身
車奔安道
以中之賦
李氏其後
宜矣李忠
定公謂之

信道則過
情之譽矣

殘如盜跖、而得終其天年、酷如杜周、張湯、而子孫咸
顯大於當世、是禍淫之道、有時而不行也、夫得福者
君子之常、而反禍焉者、君子之不幸也、得禍者、小人
之常、而反福焉者、小人之幸也、將處夫幸不幸之間、
固未可必、而君子之所以治心修身、尊德性而道問
學者、蓋專以自爲、豈竊竊然以是徼福於天哉、問學
已明、德性已成、志氣之修、其視富貴如浮雲、精神之
全、其視身世如夢幻、若然者、雖貧不慊于貴、雖夭而
有所謂不亡者存、雖子孫不振、而有所謂傳而不知
其盡者存、榮辱驚懼、不入於胸次、其精神志氣、足以

傲睨天地、而與外生死、無終始者、爲友、又奚禍福之足云、昔者吾友子寬、嘗從事於斯矣、子寬姓蕭氏、名愐、世爲延平之尤溪人、博學好古、凡六經諸史、百家之言、陰陽五行、天文地理之學、貫穿馳騫、無所不通、與人持論、辯博閎肆、聽之纒纒忘倦、尤善著書、自成一家言、其爲人孝友愷悌、敦尚節操、於世味泊如也、然而學成而道益窮、志立而身愈固、自擢第歷官幾二十年、而位不升於朝列、負郭之田、不足以糊口、官于南雄、不幸道疾而死、而年不迨五十、傳家惟一子、且以疾廢、是君子之所謂不幸者、舉集於其身、自世

人觀之、其不可哀也耶、然子寬於予、平昔最厚善、予嘗從容叩其治心修身之說、高明穎脫、無所滯礙、非徒言之、亦允蹈之、故其生也、能輕富貴而甘貧賤、則其死也、所謂壽而不亡、傳而不知其盡者、必有在矣、世人哀之、安知其不以此而復哀世人也、予懼世之不察者、致疑於其間、故爲之作哀辭、以道意云、

有美一人兮、外和而內剛、韞金玉之精粹兮、佩蘭茝之芬芳、包古今於學問兮、達至意於文章、位不足以稱其德兮、祿不足以養其生、謂難老而早死兮、宜有子而病狂、哀善人之不淑兮、信天道之叵量、惟君子

之脩身兮、貴力學而自強、蓋端以爲已兮、豈責報於
彼蒼、存一氣之孔神兮、體此道以翱翔、齊死生於晝
夜兮、何富貴之足臧、觀吾身於露電兮、顧委蛇之何
傷、並天地以悠久兮、與日月而爭光、外萬物而獨立
兮、謝塵寰於粃糠、嗟世俗之迫隘兮、咸物逐而我忘、
眇所得之毫釐兮、遽氣盈而志張、廓宇宙以遐觀兮、
寄一身於八荒、前千古之悠悠兮、後百世之茫茫、儉
榮耀於瞬息兮、將見咲於大方、夫豈得擅而有之兮、
溘朝露而泯藏、與草木以同腐兮、何山高而水長、惟
夫子之英爽兮、顧死生而不忘、託友義於斯文兮、庶

德音之播揚

劉仲偃大資政哀辭

劉公諱齡當忠定公宣撫河北時劉與公不合及其

死難而公哀之如此此其所以爲忠定也

靖康改元之夏、金人攻圍太原、聚重兵河北境上、余承乏樞廷、被命宣撫兩路、以真定帥資政劉公爲副、秋七月、余得旨駐師懷州、劉治兵遼城、以王淵、王瓌、鄭建雄、統制軍馬、時制置使解潛、龍圖閣待制折彥、質、主隆德府路都統制折可求、都轉運使張灝、主汾州路、期以七月末進兵、獨解潛與虜騎遇、南北關、力戰而潰、餘皆不進、余上疏請治諸將、不如約者、且止

諸司、無得專達、一聽宣撫司節制、以議再舉、不如此
必誤國事、願乞罷去、有旨召赴闕議事、而以种師道
代、時八月二十三日也、已而師道病死軍中、即以劉
公爲宣撫司、折彥質副之、其冬金人兩路深入、劉公
造朝、城陷、遂死節於虜營、嗟乎、士固有一死、或重於
泰山、或輕於鴻毛、非死之難、處死之爲難也、處之而
是、如張巡之守睢陽、其食人以爲糧者、可畧也、處之
而非、如樊系之草朱泚冊文、冊成而後仰藥、又何補
哉、方靖康之末、天傾地覆、君臣易位、朝鮮仗節死難
之士、幾何不爲夷狄所笑、而劉公毅然、不以用舍動

其心視死如歸、遺書其家、陳義可觀、足以激懦夫而
羞失節之伍、豈不誠丈夫哉、使其平生行已、不無瑕
類、猶可以大節而掩小疵、矧夫愷悌之德、強敏之材、
疏通之智、如銘議之所載、皆有大過人者、是宜贈典、
褒崇、錫謚、忠顯、天子親書其碑額、以垂榮於無窮也、
余與公、幸有一日之雅、其子子羽、以墓銘謚議來求
挽章、余謂旣葬、則挽章無用、作哀辭以慰其心焉、其
詞曰、

士有一死、處之爲難、死得其所、名重太山、倚嗟劉公、
惟人之傑、舍生取義、成此大節、夷狄歎息、矧惟士夫、

激懦愧媿、名教之扶、美謚易名、宸章篆碑、爲宋忠臣、
萬世同輝、我作哀辭、以慰其子、勿爲公哀、公實不死、

弔國塲文

壁敘中人監軍之樊足爲炯鑒

宣和元年春、用師西鄙、熙河帥劉法、與其軍俱殲、用
事者、以違節制罪之、贈典不及、予竊哀焉、作斯文以
弔之、其辭曰、

夏人不賓兮、西鄙聳驚、蜎結蟻聚兮、屯羊犬之羶腥、
帝赫斯怒兮、命諸帥以徂征、哀師鞠旅兮、致天討於
不庭、蕞爾小醜兮、仇大邦、匿其精壯兮、示以不爭、王
師如入無人之境兮、遽捷奏於三城、縱四路之分入

今以全力而當熙河之兵、惟熙帥之寡謀、今知不可而弗明、統十萬之驍勝、今謂可以深蹂而橫行、路遭迴以崎嶇、今山斗絕而崢嶸、決積水於千仞、今灌長波於聯營、師不戰而自屈、今雖有智、何以施其能、墮黠虜之計中、今失天時與地利、顧出塞之幾何、今亡隻輪與匹騎、豈無偏裨之勇畧、今與士卒之猛鷲、棄甲冑之精堅、今投器械之犀銳、山積雲委、不可計數、今咸舉而填於廬山之壑、推於饑虎之喙、彼本兵之仇人、今方懼罪而自爲計、匿實狀而不聞、今謂焉斃而崖墜、士卒散于逋逃、今將吏殞於白斃、痛忠魂之

誰訴兮、激壯士之憤氣、惟一勝而一負兮、乃兵家之
常勢、柰何不使吾君之得聞兮、以邊事而爲戒、邈九
重之高深兮、豈天下之耳目、皆可以欺而蔽也、嗚呼、
噫嘻、想夫貔虎之將、熊羆之師、耀日戈甲、蔽野旌旗、
力蹙勢窮、漸車裂帷、鼓聲不起、士氣已衰、進不得戰、
退無所歸、魚驚沸鼎、獸駭危機、方腹背之俱潰、何爪
牙之可施、蹈踐紛籍、奔崩流離、血膏草莽、骨委山陬、
氣鬱鬱以衝漢、魂惛惛而曷依、兵有節制、固不可違、
若李廣之失道、與張騫之後期、或逗遛而怯敵、或敗
北而喪師、失軍事之機會、故可以違節制而罪之、豈

有肝腦塗地、身首分披、執干戈以衛社稷、援枹鼓而
死邊陲、忘其大烈、据此細微、縱一帥之有罪、顧三軍
之曷其、贈弔不及、賻賵不時、沒者已矣、生者長悲、其
何以勵封疆之臣、而慰邊人之思、古者命將、付之間
外、便宜則行、不從中制、量敵而進、慮勝而會、利則伸
而鈍、則蟠戰必勝、而攻則潰、亞夫細柳之軍、雖君命
有所不受、充國金城之畧、雖衆口莫得而議也、後世
行軍顛倒紛綸、以將帥爲不足信、則盡護之以中人、
口含天憲、手握國鈞、功罪莫實、賞罰不倫、掣肘繫足、
智謀曷伸、彼九節度之師、所以皆敗者、以有軍容之

朝恩而德裕之相、武宗之所以能討叛鋤逆者、以盡
罷諸鎮之監軍、知此甚易、其誰敢陳、吾獨悲夫、事君
之事、食君之食、荷戈從軍、死固其職、惟身沒而名顯、
可嗟悼而歎息、茫茫虜地、兮流沙千里、空山無人兮
羌行如鬼、砂磧不毛兮、雪霜夏墜、竟兮歸來兮、彼西
方不可以止、敷德澤於幽明兮、惟聖天子、

祭陳瑩中左司文

瑩中即了齋陳壘也

惟公擢秀甲科、實自妙齡、寢階膺仕、藹然休聲、以節
義爲防範、而行不苟合、以公忠爲鑒裁、而物無遜情、
其在言責、抗章論辯、不可勝紀、而言之最著者、有先

知獨見之明、其在譴逐險阻艱難、無不脩葺而心不
少懈者、惟愛君憂國之誠、一斥不復、踰二十年、而志
氣不衰、容貌不枯者、蓋以所養之厚、脫去世累、怡然
委化、而了無芥蒂、恬無疾苦者、蓋其所造之精、嗚呼
哀哉、天之生賢、千載比肩、而在理有不可知者、旣克
生之、而不使之有成、人之云亡、士夫是悼、而在公無
可憾者、身雖沒、而有不朽之令名、惟公胸中、素所蘊
蓄、雖設施之未曾、然推原其心、夷攷其行、合海內之
公言、古之所謂自任天下之重、特立獨行、而不顧者、
諒非公而誰稱、嗚呼哀哉、公與先子、平生故人、金石

之交情切天倫、我初識公浙江之濱、忘德與齒、襟期
自親、迨謫沙陽、通問慙慙、許與之厚、銘心書紳、我歸
自南、遽遭憫凶、孤苦杜門、公亦北徙、一水相望、慰誨
諄諄、何翰墨之未乾、而死生之未分、悵蒼生之失望、
痛故老之凋淪、睠淮楚而殞涕、嗟徃弔之無因、寓哀
情于一奠、冀靈爽之或聞、

祭黃大資政墓文

黃公名履邵武人
黃長睿之祖也

維紹興二年、歲次壬子、五月庚申朔、三十日、己丑、甥
孫、具位李綱、謹以清酌庶羞、蔬果香茗之奠、致祭於
舅翁特進大資政黃公之靈、惟公節行直方、問學淵

懿致位丞轄、鬱爲名臣、盛德元勲、載在信史、搢紳之士、多能言之、非綱小子、所敢稱述、惟我先考、乃公之甥、孩提而孤、鞠於外氏、誨誘長育、如已子然、甥舅之情、世所罕儷、顧茲孱陋、慶流有衍、幼荷獎知、命以名字、死生契濶、三十餘年、遭時艱難、叨任宰輔、再奮再躡、天實使之、誤蒙大恩、起自閑廢、俾總師旅、徃撫南邦、假道故鄉、恭造墓下、敢修薄奠、式薦微誠、追懷音容、有淚如瀉、英爽不泯、庶幾歆之、尚饗、

宋史於黃公有不滿之辭、忠定屢稱之、不置此竟以節行相推、忠定非阿私所親者、以此知國史之所褒譏亦未可盡信也



